



## Publicaziuns dalla vischnaunca, jamna 47

### Votaziuns communalas e votaziun federala

**L'urna principala** en casa communalas ei aviarta sco suonda:  
Dumengia, ils 27-11-2016, 9.00–11.00

La documentaziun da votar duess mintga votant/a haver obteniu. Cass cuntrari san ins s'annunziar immediatamein, denton **sil pli tard entochen venderdis, ils 25 da november 2016, allas 17.00** tier l'administraziun communalas (tel. 081 920 36 36).

### Levgiament da votar

Mintga votant/a ha la pusseivladad da dar giu sia vusch a scret. En gliez mument sto el/la observar il suandont:

1. Emplenir ora ils cedels da votar a maun e metter quels en la cuviarta da votar grischa e **serrar giu** ella.
2. Metter la cuviarta da votar grischa ensemen cun il certificat dil dretg da votar **suttascret** en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communalas saveis Vus tarmetter cun posta (suppli cau da francar) ni directamein fierer en la scaffa da brevs dalla casa communalas.

Ils cedels da votar ston esser sil pli tard la dumengia, ils 27 da november 2016 allas 11.00 tier l'administraziun communalas.

**Aschinavon ch'ei vegn buca risguardau sura instrucziuns da votar, ein ils cedels da votar nun-valeivels.**

*Suprastonza communalas*

---

### Damondas da baghegiar

#### 2016-1064.000

##### Datum dalla publicaziun: **Ils 25 da november 2016**

Il patron: Carli Pally-Capaul, Via Luzzas 5, 7180 Disentis/Mustér  
Il representant: Carli Pally-Capaul, Via Luzzas 5, 7180 Disentis/Mustér  
Object: Sanaziun ed engrondaziun dil balcon, parcella 695, Via da scola 1, 7180 Disentis/Mustér

#### 2016-1068.000

##### Datum dalla publicaziun: **Ils 25 da november 2016**

Il patron: Alex Albrecht-Printz, Via Cons 7, 7180 Disentis/Mustér  
Il representant: Arhitekta AG, Arno Vogel, Zurzacherstrasse 232, 5200 Brugg  
Object: Construcziun d'in carport e da dus balcon, parcella 778, Via Cons 7, 7180 Disentis/Mustér.

- Ils plans da construcziun ein deponi tier l'administraziun communalas.
- L'investa publica cuoza 20 dis dapi il datum dalla publicaziun.
- Eventualas protestas encunter sura damondas da baghegiar ein d'inoltrar a scret enteifer 20 dis all'instanza da baghegiar, caum postal 57, 7180 Disentis/ Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 23 da november 2016  
*Uffeci da baghegiar Disentis/Mustér*

---

### Lubientschas da baghegiar

L'instanza da baghegiar ha concediu suandontas lubientschas da baghegiar:



**Nr. 2016 – 1032.000**

Erwin Caminada-Mühlebach, Via Gonda 12, 7180 Disentis/Mustér; sanaziun digl access e dils mirs schetgs, parcelas 2837 e 2838, Sontga Gada, 7180 Disentis/Mustér.

**Nr. 2016 – 1049.000**

Aluis e Karin Riedi, Pardomat 6, 7180 Disentis/Mustér; baghetg annex niev per ina scala sco access niev, renovar igl access existent, parcella 2320, Pardomat 6, 7180 Disentis/Mustér.

**Nr. 2016 – 1056.000**

Doris Tuor-Rieser, Via Dulezi 19, 7180 Disentis/Mustér; engrondaziun e sanaziun dalla habitaziun en l'emprema alzada dalla casa sin parcella 624, Via Dulezi 19, 7186 Segnas.

Disentis/Mustér, ils 22 da november 2016

*Uffeci da baghegiar Disentis/Mustér*

---

## Cussegl da vischnaunca

### Rapport dalla seduta dils 17-11-2016

En sia seduta dils 17 da november 2016 ha il cussegl da vischnaunca sut il tgamun da Livio Zanetti tractau las revisiuns parzialas dil regulativ d'indemnisaziun sco era dalla lescha-santeri.

La tractaziun dil preventiv 2017 ei vegnida tgamunada dil vicepresident dil cussegl, Christoph Berger. Il quen da gudogn e sperdita preveda expensas da 14,06 milliuns francs ed entradas da 14,72 milliuns francs. Aschia seresulta in surpli d'entradas da 664 700 francs. Grazia als fetg buns quens dils onns vargai (retuorn a tschep Ovra Russein, vendita d'energia da participaziun, mesiras da spargn persistentas) ha la vischnaunca saviu reducir marcantamein ils deivets bancars.

Cun l'introducziun dil niev model da quen vegnan las investiziuns amortisadas durant il cuoz da veta linear e buca sco entochen dacheu degressiv. Plinavon vegnan las investiziuns previdas el preventiv 2017 gia amortisadas el quen da gudogn e sperdita 2017. Quei ha la consequenza che las amortisaziuns ordinarias creschan visavi ils onns vargai.

Il cash-flow ei cun frs. 1 247 700.– cuntenteivels e sesanfla el rom dil preventiv 2016. Igl onn 2017 ei previu aultas investiziuns da 9,31 milliuns francs ed entradas da 2,68 milliuns francs. Cheutras sere-sultan investiziuns nettas da 6,63 milliuns francs. Las grondas investiziuns ein previdas per la planisaziun da sanar la casa da scola, per la sanaziun dil Center da sport e cultura, per la canalisaziun e serenera, per l'erecziun dil rempar Val Aletta e la correctura dalla Via Aletta sco era plirs projects turistics.

Il cussegl da vischnaunca ha suenter ina buna e fundada discussiun approbau unanimamein il preventiv 2017, fixau il pei da taglia sin entradas e facultad sin 120% e la taglia sin schischom sin 1,7% (sco entochen dacheu).

Plinavon ha il cussegl da vischnaunca approbau la revisiun parziala dalla lescha-santeri. La revisiun parziala ei stada necessaria muort la pusseivladad da satrar ella fossa communabla. En connex cun las mesiras da spargn 2015 aveva il cussegl da vischnaunca decidu da desister dil daner da seduta. Cunquei ch'il cussegl da vischnaunca ha revocau quella decisiun, basegna ei negina revisiun dil regulativ d'indemnisaziun.

La revisiun parziala dalla lescha santeri ed il preventiv 2017 vegnan suttamess al referendum facultativ.

### *Suprastonza communal*

#### **Referendum facultativ**

A caschun da sia seduta dils 17 da november 2016 ha il cussegl da vischnaunca approbau unanimamein aschibein la revisiun parziala dalla lescha-santeri sco era il preventiv 2017.

Conform ad art. 21, lit. a resp. b dalla constituziun communal ein quellas decisiuns suttamessas al referendum facultativ. Ils messadis tier sura fatschentas incl. la lescha-santeri revedida ed il preventiv 2017 ein exponi per investa en casa communal (stanza nr. 10). Enteifer 20 dis dapi la publicaziun officiala han 80 votants la pusseivladad d'inoltrar enviars sura conclus il referendum e pretender ina votaziun dil pievel.

### *Suprastonza communal*

---



## Cussegl da vischnaunca

**Preavis davart la seduta constitutiva Venderdis, ils 13 da schaner 2017** allas 19.00 ha liug en halla Cons la seduta constitutiva dalla nova perioda d'uffeci. Cun quella occasiun vegnan las autoritads communalas saramentadas. Quella manifestaziun ei publica e destinada per l'entira populaziun.

*Suprastonza communal*

---

## Viafier retica

### Novas plazzas da locomotivist/a a Mustér

La Viafier retica ponderescha da scaffir a Mustér in niev liug da depot. En vesta a quei legreivel fatg enquera ella personas ch'ei interessadas vid in engaschament sco locomotivist/a.

Persunas fascinadas da quei mistregn che possedan aunc buca la scolaziun da locomotivist/a ei la Viafier retica bugen promta da scolar. Las incaricas e las qualificaziuns ein d'anflar sut [www.rhb.ch/offene-stellen](http://www.rhb.ch/offene-stellen). Ulteriur sclariment dat bugen signur Moreno Beti dalla Viafier retica, tel. 081 288 53 21, ni [moreno.beti@rhb.ch](mailto:moreno.beti@rhb.ch).

Nus lein cheutras animar personas interessadas da s'informar e s'annunziar per quellas sis tochen diesch novas ed ordvart interessantas plazzas da lavur ch'ei previdas da scaffir en nossa vischnaunca.

*Suprastonza communal*

---

## Via Run – Serrada

Muort lavurs da reparatura vid la via d'uaul Run vegn la via serrada naven dils **2 da november entochen ils 30 da november 2016** per tut traffic motorisau. Per tuttas sendas sco era per velos e pedunzs ei igl access da tut temps pussevils. Bien engraziament per l'enconuschientscha e capientscha.

*Uffeci forestal*

---

## Dascha-pégn per il temps d'advent

A Cuoz sil plaz da lenna sper il stradun metta il menaschi tecnic a disposiziun dascha-pégn. Tgi che fa diever da quei survetsch sa retrer quella naven d'immediat.

In bi temps d'advent giavischa  
*Menaschi tecnic Disentis/Mustér.*

---

## Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica. Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu).

Quellas lavurs ston esser finidas sil pli tard entochen la **fin da november 2016**. En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il survetsch tecnic dalla vischnaunca cun adossar ils cuosts als proprietaris.

*Uffeci da baghegiar Disentis/Mustér*

---



## Vischinadi Segnas/Mompé Tujetsch

**Invit alla radunonza generala da mardis, ils 13 da december 2016** allas 20.15 en l'ustria «Cresta», Segnas.

Tractandas

1. beinvegni
2. elecziun dad in dumbravuschs
3. prelecziun ed approbaziun dil protocol
4. orientaziun president
5. rendaquen e rapport dils revisurs
6. fixar tscheins per diever zona
7. elecziuns:
  - dil president
  - digl actuar e vicepresident
  - dad in revisur da quen
8. approbaziun via da meglieraziun atras zona
9. program da lavur
10. deliberaziun da damondas e propostas
11. varia

Cordialmein envida

*la suprastonza dil vischinadi Segnas/Mompé Tujetsch*

---

## Uniun da dunnas Mustér

### Gruppa da seruschnar/termagliar

La gruppa da seruschnar/termagliar envida tut ils affons entochen treis onns, ensemen cun lur mummas ni era babs e fargliuns, da passentar in bi suentermiezdi da cumpignia. Als affons vegn purschiu in ambient cumadeivel per termagliar ferton che las mummas/ils babs san sediscutar in cun l'auter. Ei vegn purschiu caffè, te ed aua.

Datum: **mardis, ils 29 da november 2016**

Temps: 14.30–16.00

Liug: Casa da scola Segnas, local Artgin

Per ulteriur sclariment saveis Vus contactar Daniela Schmed sut 076 404 82 69

---

## Acziun da spender saung

L'acziun da spender saung per donaturas e donaturs dallas vischnauncas da Medel e Mustér ha liug **gliendisdis, ils 28 da november 2016** allas 18.00–20.00 en halla Cons. Nus engraziein grondamein per quei bien survetsch en favur da malsauns e disgraziai e sperein sin ina stedia participaziun. Bugen beneventein nus era novas donatras e novs donaturs.

Cordial beinvegni

*Uniun samaritana Mustér*

---

## «Sibla 2017»

### Encuretg redacturas e redacturs

Has tschaffen da scriver texts che furan e fan surir? Lu eis Ti exact la dretga persuna per la redacziun dalla «Sibla». Per quella redacziun enquera l'uniun da tscheiver Mustér numnadamein ella Cadi redacturas e redacturs per saver realisar la Sibla 2017. S'annunzia tier gion.hosang@tscheiver.ch ni per telefon 079 690 97 42



### Encuretg historias

Has da raquintar d'in legher schabetg? Has viu zatgi ch'ei sestalegiaus aschia ch'igl ei da rir da schluppar? Has ina historia nua che Siblus duess aunc furar in tec? Lu annunzia quella a siblus@tscheiver.ch ni via la pagina d'internet www.tscheiver.ch. La redacziun decida davart la publicaziun dils texts. Texts anonims vegnan buca risguardai.

---

### Stallkino: «Sonita» (Afghanistan 2015)

**Donnerstag, 1. Dezember 2016**, Nachtessen ab 19 Uhr, Filmstart 20 Uhr

#### Filme von anderswo – Afghanistan

Die 18-jährige Afghanin Sonita lebt als illegale Migrantin im Iran. Eines Tages erhält sie die Nachricht, dass sie in Afghanistan verheiratet werden soll. Doch sie hat einen anderen Traum: Sie liebt die Musik und möchte Rapperin werden. Eine engagierte Dokumentation über eine mutige, junge Frau. Die Filmreihe «Filme von anderswo» wird von Asylsuchenden des Transitentrums gemeinsam mit jungen Menschen aus Disentis/Mustér organisiert. Um 19 Uhr laden die Asylsuchenden zu einem Nachtessen mit afghanischen Spezialitäten ein und anschliessend gibt es ein Filmgespräch mit zwei Flüchtlingen aus Afghanistan. Für das Nachtessen und den Film machen wir eine Kollekte.

#### Film: «La vache» (F 2016)

**Mesjamna, ils 7 da december**, allas 20.00

«La vache» raquenta la historia d'in pur algerian che siemiadall'exposiziun da biestga ell'Europa. E ei loschs sin sia vacca Jacqueline e fa in viadi a pei naven da sia tiara entochen Paris. Ina sentupada da duas culturas differentas e dus munds agricoli differentes en in film che fa surrir. Entrada libra, collecta.

---

### Finiastras d'Advent

Cun gronda premura ed anim han biabein 40 affons dil vischinadi Segnas/Mompé Tujetsch, ensemen cun lur gidonters, creau uonn ils maletgs per las quater finiastras. Las finiastras vegnan aviartas suandontamein ed illuminadas mintga sera naven dallas 17.00–22.00 entochen ils 6 da schaner 2017.

**1. finiastra d'Advent, ils 27-11-2016:**

Silvia e Guido Bucheli-Caduff, Via Peisel 2, Segnas

**2. finiastra d'Advent, ils 4-12-2016:**

Barla e Mathias Jacomet-Caminada, Via Peisel 20, Segnas

**3. finiastra d'Advent, ils 11-12-2016:**

Marlene ed Edwin Deflorin-Rainalter, Gassa da Cuoz 21, Segnas

**4. finiastra d'Advent, ils 18-12-2016:**

Rosmarie e Rico Duff-Albin, Via Vallars 9, Segnas

Vegni e contemplei, selegrei e sentupei cun nus!

Cordial'invitaziun

Vischinadi Segnas/Mompé Tujetsch

---

### Sontgaclau da Funs–Latis–Clavaniev

Sco usitau s'entaupan ils vischins e las vischinas da Funs, Latis e Clavaniev, **sonda, ils 3-12-2016** suenter messa da Sontgaclau, allas 17.00 el curtin dalla «Villa». Plinavon dat ei era uonn in program special pils affons. Per dapli informaziuns: Aurelia Flepp; 076 533 83 60. Bugen fa il Sontgaclau era ina viseta tier Vus a casa.

Sontgaclau Clavaniev: Fabio Flepp, fabio@flepps.ch e Funs e Latis: Adrian Huonder, adrian93@gmx.ch. Nus selegrein d'astgar beneventar vus en il curtin dalla Villa.

---



### Sontgaclau Vitg

**Sonda, ils 3 da december 2016** viseta il Sontgaclau Vitg las famiglias dalla fracziun Vitg.

13:30 viseta ellas ustrias dil vitg

15.30 messa da Sontgaclau, baselgia parochiala s.Gions

16.30 sentupada cun Sontgaclau avon halla Cons

Silsuenter viseta dil Sontgaclau da Vitg ellas casadas.

Il Sontgaclau viseta era uonn bugen Vus a casa. Voss'annunzia per mail [sontgaclauvitg@hotmail.com](mailto:sontgaclauvitg@hotmail.com) ni per posta Sontgaclau Vitg 2016, Posta, 7180 Mustér, fagess a nus grond plascher.

Cordials salids

*Uniun da giuventetgna Mustér/fracziun Vitg*

---

### Sontgaclau viseta ils seniors

**Dumengia, ils 4 da december 2016**, allas 13.30 en-tochen allas 16.00 en halla Cons.

Cun grond plascher envidein nus convischinas e convischins da 60 onns ensi alla tradiziunala sentupada cun Sontgaclau. Cun in pign program, la viseta dil Sontgaclau ed in puschegn lein nus porscher a Vus in pèr emperneivlas uras en buna cumpignia.

Nus selegrein da passentar ensemen cun Vus in bi suentermiezdi.

*Uniun da dunnas Disentis/Mustér*

---

### Sontgaclau da Segnas/Acletta

Sco mintg'onn viseta Sontgaclau da Segnas-Acletta ils **3-12-2016** las famiglias. Per ch'el stoppi buca star avon escha serrada, supplichescha el da comunicar sch'el astga vegnir a far ina viseta. Igl ei d'avantatg sche Vus tarmetteis in pèr cavazzins davart tgei che Sontgaclau duei menziunar enviers ils presents en special ils affons.

Igl oremus vegn prelegius sonda allas 21.00 avon baselgia ad Acletta ed allas 23.00 ell' ustria «Cresta» a Segnas. Ei fagess grond plascher d'astgar beneventar ina massa vischins. Las annunzias e cavazzins san vegnir tarmess entochen ils 2-12-2016 alla suondonta adressa: Rafael Maissen, Via Acletta 22, 7180 Disentis/ Mustér ni per mail a: [rafaelmaissen@bluewin.ch](mailto:rafaelmaissen@bluewin.ch)

Cordial engraziament

*Uniun da giuventetgna Segnas-Acletta*

---

### UGG – Uniun da giuventetgna Gonda/Dulezi/S. Gions

Sontgaclau e sia suite selegrein da puspei astgar visitar pigns e gronds. Uonn vegn quei ad esser **sonda, ils 3 da december**. Sco gia gl'onn vargau ei Sontgaclau cuntunschibels per e-mail sut l'adressa [sontgaclau@ugg.ch](mailto:sontgaclau@ugg.ch) ni per tel. 076 393 21 02. Ils habitonts da Gonda/Dulezi/S. Gions che retscheivan bugen sia viseta a casa ein supplicai da s'annunziar tochen ils 30 da november 2016 cun far las indicaziuns usitadas.

Era uonn envida Sontgaclau pigns e gronds ad in sitg cauld suenter messa (plaz avon garascha dalla famiglia Huonder-Flury). Sontgaclau e sia suite engrazian per la collaboraziun e selegrein sin bialas sentupadas.

*UGG*

---